

Galesia

1 ¹Ŋai aposel Pol. Ŋai tamol adi ta didinag go ŋator na ya. Tamol ta ŋai bilalun urat lo ta iginiag na ya. Tia, urat en man Jesus Kristus, Bai Tubud enti a mutou lo ifufunig yabisa yan da, inŋsed ŋai banig lo digane ya. ²Ŋai teig muroug Kris ak dadi fidian mumado dugo, ŋai girek en aŋ tamolpein Galesia distrik san midaeŋ fidian sam na ŋiganeg ipalu da.

³Idsad Bai Anut, idaned Tubun ak Jesus Kristus da, inŋsad ilo panek agod ilo maror aŋ lo yen o ŋugudani da. ⁴Kristus idsad Tubun ak, idsad aupasek ipasi san niŋen o, inŋanen kumaen an ibisei a. Kagin saiak saiak gamu tan en lo yen den, inŋsan mateŋ an lo id inŋiliad go patud ipasi a. Saen inŋ ago igane man, inŋ Bai Anut san ilobol an iri pani a. ⁵Ak niŋen o id nal fidian lo Anut inŋanen yaŋan mi pempem tabisap yau a. Rumok.

Bilalun uyan ak man inŋ kisaek mi a

⁶Ŋai ŋarut saian da, man dugo, aŋ Anut enti a Kristus san ilo panek lo igian an patum apani kisaek oŋ a. Agog aŋ abileksag malam yaug bilalun senamo geig an ale dugo an mi ari apani da. ⁷Bilalun naon sen ak taida mi ak i? Tia geig a. Ak gug aenta e dumado den maeg diganep aŋ ilom muruan dupanaŋ a. Kristus inŋanen bilalun uyanan en naon sensen inŋ dubulisa dibilila wo ilod ibol da. ⁸Aloŋ uyan a. Maŋ boi, tia, eŋel adi kumaen panu lo yak ta boi, bilalun wagam maŋ imug murupaian an miriŋanip, bilalun sen ak ta murupaian tap, aria, maŋ mi misilanek ru lo madup Ades lo mumado wa. ⁹Aria, maŋ ru a wagam murupaian an ŋai gamu fon ŋurupaian da. Talpein ta bilalun naon sen ak ibol ilasag, bilalun a aŋ aŋane la yan ida naon kisaek tia tap, Anut inŋ imisilanip Ades lo yau a.

¹⁰Ru e gamu ŋai ŋabol den lo man, tamol adi ŋai niŋeŋ o ilod uyan panag dak niŋen o ilod ŋiŋane di? Man tia ya, Anut mi ŋai ilo uyan ipanag o ilog ibol da. Gug aŋ dag ŋai tamolpein ilod uyan o mi urat ŋigane dan ago ilom isou di? Aloŋ uyanan. Ŋai kagin an ago mi ŋigane yau tap man, ŋai Kristus inŋanen urat tamol mok tia ya.

Pol san bilalun man Kristus awan lo mi ilasa ya

¹¹O teig adi, aŋ mel en aloŋ uyan o ilog yen da. Bilalun uyanan a ŋai imug mi ŋupiteŋanaŋ se yan man, tamol adi sad bilalun tia ya. ¹²Ŋai

bilaluŋ en tamol sen ak lo ta ɲiɲane na ya. Tamol ensauta adi dam ɲai ta dukubiai dupanag na ya. Tia, saen Jesus Kristus iɲsen tinin walal te ilasa dugo ɲile yan lo, bilaluŋ ru en ɲai ikubiai ipanag a.

¹³ Aria, Juda sad kagin a ɲai imug mi ɲiri pani se yan ɲiɲen o man aɲ aloŋ la ya. ɲai man Anut san midaeɲ fidian sad tamolpein ɲuparfufai dudu san kagin lo ɲatur sakar na ya. Ilo rumok tamolpein wei mok ɲai ɲipitiɲinai se ya, an lo iɲanen midaeɲ fidian daonɲ ɲupidinai o wagai ɲigane se ya. ¹⁴ ɲaisag tamolpein lulunad lo Juda adi sad ubou leil kagin lo ɲai imug mi ɲau a, agod ɲai tamol wei mi iɲaned anaɲar ɲaisag da naon kisaek mi an ɲiriɲanai a. Man dugo, ɲaisag malag kubulan sad tamol kagin ɲiri wo tubun mi ilog ɲupani na ya.

¹⁵ Ak man, ɲai tinag gamugo iginiagsi dugo Anut ɲai kob ipanag la ya, agog murnag iɲsan ilo panek lo dam ɲai igiag a. ¹⁶ Saen an lo Anut ilo uyan lom, iɲanen Nanun ɲai naog na kuai tem ikubiai panag a. Ago dop lo tamolpein Juda tia yan lulunad lo Kristus ɲiɲen o mi ru ɲufulale wa. Ak gug saen an lo ɲai tamol aenta tan en san dadi ta mukubiai na ya. ¹⁷ Agod ɲai gamugo dugo aposel adi a iɲ imug dumado yan, ɲeil san ɲiɲen o Jerusalem na ta ɲau na ya. Tia, ɲai Arabia adi sad tan an lo ɲaug ante ɲumado ya. Ago gug murnag Damaskus na afon ɲamul ɲau a.

¹⁸ Anteg anaɲar utol yau gug, Jerusalem na Pita da mukubiai o ɲau a. Ante nal 15 mi iɲ da mumado ya. ¹⁹ Saen an lo ɲai aposel aenta ɲeil man tia ya. Jems, Tubun ak san tein, nek iɲ mi ɲile ya. ²⁰ (An lo gamu ru e aɲ o ɲigire den, rumok mi, Anut naon na igo ɲabol da, ɲai aɲ ru sewak ta ɲupanaɲ na da.) ²¹ Aria, ɲai Siria distrik lo ɲadug, Silisia distrik lo dam ɲau a. ²² Saen an lo Kristus san midaeɲ adi Juda na dumado dan iɲ ɲai naog ta dile na ya. ²³ Iɲ ɲaisag ru tim mi dulonɲ se ya, “Tamol a imug id ifunad tamat o igane se yan, gamu en ilo rumok san ru ibol ilasa da. An lo ilo rumok a imug malan isue san ɲiɲen o wagai igane na yan, gamu nek amaiak mi dabai ipani da.” ²⁴ Fun an ɲiɲen o iɲ ɲai ɲiɲeg o Anut yaɲan diabisa ya.

Aposel aenta Pol dadi ilod kisaek a

2 ¹ Murnag anaɲar 14 yaug, Barnabas ɲiɲaneg fon Jerusalem na mamul a. Taitus dam ida mau a. ² Man dugo, Anut iɲsen ɲai Jerusalem na ɲau o ikubiai panag a, an ɲiɲen o ɲai ɲaug atna ɲumado ya. Ante ɲai ubou leil san tamol adi dadi mukubiai dugo, bilaluŋ uyanan a gob adi lulunad lo ɲabol ilasa se yan naod na ɲufulaleg dulonɲ a. (Gug mianuk lo mi tamol adi a yaɲad tubun ak amad da yan dida bilaluŋ awan an san fun dam ɲufulaleg dulonɲ a.) Kabelan ɲaisag piteɲanek dibitinae dop ɲai naok naok aenta lo kawan ɲumaspalu se yak ago dubol banau. ³ Aria, Taitus iɲ ɲai da mumado ya, iɲ Grik dar bo man, gurman adi Juda sad muluŋ lo idu san ɲiɲen o ɲai ta disadudunag na ya.

⁴Gug rumok, teid sewak adi in dimianuk on go, mansama tumanek lo disadu ya. Id wagam kubiaen san subanek lo tumado na ya, gug gamu patun fo tilasag tumado da. Fun man id Kristus da tutumani an lo mi a. Tamol sewak adi mianuk lo disadu yan san fun man, idsad madok foun ak lo tator dan ninen o aban dikibiani wa. Insad ilobol igo ya, id afon insad subanek an lo tiladu san ninen o disadudunad a. ⁵Ak man man an ninemi wo, in awad paen na ta mumado na ya. Man tia geig a. Amaiak lo bilalun san ru rumok an lulunam lo itaot mok pempem yen a.

⁶Tamol adi a midaen san leil lo yanad anda yan, in naisag ru en awan ta dibate na ya, man dugo, naisag piterjanek fidian itaot a. (Naisag ilog lo man, rumok in yanad da i? Tia i? An man mel tusan a. Anut in tamol yanad amad da yak ninedi wo mi ilon ta isou na da.) Aria, tamol a yanad amad da yan insad ru ta naisag ru ta fo dubate man tia ya. ⁷Tia geig a. In Anut insen bilalun uyanan nufulale san urat banig lo igane yan dile uyanan a. Nek ibol Anut imug Pita ipilianig Juda tamolpein naod na bilalun uyanan ibol ilasa yak igo won, nai itarpasag go tamolpein Juda tia yan ru nabol dulon san an dam dulon uyanan a. ⁸(Man dugo, Anut a Pita lo Juda tamolpein bilalun uyanan dulon o urat igane se amaiak nai lo dam gob adi ninedi wo urat kisaek nek an igane se ya.) ⁹Aria, saen Jems, Pita, Jon da nai awag dulon an, ilod isafulale man Anut nai lo insan ilo panek iganeg insan urat ngane wo ipanag a. (Tamolpein aenta tamol utol an “midaen san bag tamol” igo dubol da.) An ninen o nai Barnabas da in banid won ak duwate dugo banid mabi a. In man da nug tein taon igo won dijiliama ya, man in dida iloma kisaek go awama mutumanig igo mabol, man uraru gob lulunad lo bilalun urat migane wa. Gug in man Juda tamolpein lulunad lo bilalun urat digane wak ago dubol a. ¹⁰Ru kisaek mi igo durupaiamag dubol, man tamolpein moni amad tia yan iloma isou wa. Nai kagin nek amaiak mi ninen o ilog tubun mi yen na ya.

Pol Pita ibubunani a

¹¹Ak man murnag saen Pita Antiok na ipalug ilasa man, nai Kris midaen naod na malak malak nububunani a. Man ata wo? Kagin a Antiok na igane se yan ta uyan na ya. ¹²Man dugo, tamol aenta Jems san na yak gamugo dupalu dugo, Pita in Kris tamolpein a Juda tia ak dida anan diani se ya. Ak gug saen tamol an dilasa yan lo man, isuk imul go asau mi yau a, in ibol dida nug turan tia yak ago igane ya. Man dugo, mulun lo dudu yak san tamol ninedi wo irer a. ¹³Agod Juda aenta a Kris dilasag Antiok na dumado dan in Pita dida sewak kagin digane ya. An lo Barnabas dam insad kagin sewak an iri panig balek uraru san kagin lo idu ya.

¹⁴Gug saen nai neil ak man in bilalun san ru rumok ta diganuri itaot na ya, amaiak ninen o nai fidian naod na Pita igo nurupeig nabol a. “On

Juda dar lo lasa bo man Juda sad kagin ta uri pani na da. Tia, onj gob adi sad kagin lo ago utor da. Ago tap, ata wo onj gob adi Juda sad kagin an diri dupani wo susujanai dak i? ¹⁵Onj naj da Juda sad dar lo tilasa ya, id ‘aupasek san’, nek ibol gob adi igo wonj, id ago tia ya. ¹⁶Id igo talonj la ya. Talpein ta Moses san kubiaenj iri ipani dan lo itaotan ilasa san tia ya, tia, Jesus Kristus lo ilon rumok dan inj itaotan ilasa wa. Aria, onj naj da Anut malan lo itaotan tilasa san ninjen o Jesus Kristus o ilod rumok a. An man kubiaenj san kagin naok naok a tigane dan lo man tia ya, man dugo, dal amaiak lo talpein itaotan ilasa san tia geig a.”

¹⁷“Aria, saen id Kristus lo itaot tilasa wo maeg tigane dugo, id aupasek san dal lo tator tau dan ago tile talonj man, onj dugo ilo isou di? An fun man dugo, Kristus injen id iduduwad go aupasek lo tiladu yak i? Man tia geig a! ¹⁸Man dugo, naj Moses san kubiaenj tiri tupani san kagin naok naok amaiak njurube la ya. Aria, mel a njurube la yak, an afon njususe tap man, naj kubiaenj pilalek tamol igo wonj njilasa da wa. ¹⁹Man dugo, kubiaenj an ifunag njamat a, an lo na naj afon kubiaenj paen na ta njumado na wa. Tia, gamu kubiaenj an san ar patun fo njilasa yan ninjen o, naj Anut mi paen na njumado da. ²⁰Naj aigim fo njayuk go Kristus inj naj da sisem mamat ak igo wonj a. Ago bo man, naj kumaen njumado da. Ak gug kumaen an njaisag tia ya. Tia, Kristus inj naj lo kumaen imado da. Ago yak ninjen o madok e tan en lo yen den ninjen o, Anut Nanun o ilog rumok san dal an lo mi njiri njupani da. Inj ilo panek ipanag a, agod sen tinin ibisei panag a. ²¹Man ninjen o, naj Anut san ilo panek an mel kawan ak igo wonj njigane ilasa man tia ya. Man dugo, Moses san kubiaenj an lo mi id itaotan tilasa tap man, Kristus imat an nujon tia ya.”

Ru kubiaenj uri panek san kagin, tia, ilo rumok san kagin?

3 ¹O Galesia, bururau ami enti njijeo ipanaj ak i? Man Jesus Kristus nek mukubiai panaj la ya. Ansem malam mok lo aigim fo iyuk dugo ale yak igo wonj a. Enti iganeg anj ilom ibilisa yak i? ²Mel kisaek en ninjen o mi njusumianaj da. Dal dugo yak lo anj Awan Urgun anjane yak i? Ru kubiaenj san dal lo i? Tia, bilalunj uyanan injan ru o anj ilom lo rumok ak san dal lo i? ³Ak dugo, anj dag bururau igo yak i? Agog Urgun da fun agane gug tinik san kagin lo mi wadan afutani dak i? ⁴Dag muruan imug mi anj lo ilasa yan, an anj sen ka asini ak i? Naj ilog ibol dak man, an sen ka ta asini na ya! ⁵Anut inj Awan Urgun anj ipanaj dugo kulob girager funfun dam anj lulunjam lo igane ya. Ata wo inj ago igane yak i? Dag injan ilo sou lo man anj ru kubiaenj ari apanid amaiak ninjen o i? Tia, nag anj bilalunj uyanan en injan ru alonj go ilom lo rumok ak lo ago igane i?

⁶Ru e girek lo yen igo ibol a. “Abraham inj Anut san ru ninjen o ilon rumok a. Ago yak ninjen o Anut sen inj ninjen o tamol itaotan ak ago ibol a.” ⁷Man ninjen o anj igo alonj uyanan a, tamolpein a ilo rumok amad da

yan mi iŋ Abraham nanun muroun mok a. ⁸ Ru e wagam mok Anut san girek ilon lo yen en igo ibol, “Oŋ tini lo gup tamolpein tan titin fidian lo dumado dan bar uyanan ak diŋane wa.” Ru an Anut sen Abraham ipani a. Aŋ aloŋ ak, bilaluŋ uyanan a gamu tabi dan san fun man, ru a Anut Abraham ipani an ilon lo yen a. An niŋen o id igo taloŋ ak, ru an mel e murnap ilasa san niŋen o ibol man, Anut malan lo gob adi iŋaned ilo rumok lo idiraip itaotan dilasa wa. ⁹ Amaiak niŋen o ensauta a ilo rumok amad da yan iŋ Abraham da sisem bar diŋane wa, man dugo, Abraham iŋ ilo rumok tamol a.

¹⁰ Fidian a kubiaeŋ mi duri dupani dugo, an lo Anut patud ipasi wak o tini ganei digane dan, iŋ misilaneŋ ru paen na dumado da. Man dugo, ru e girek lo yen den ibol, “Talpein ta mel fidian a kubiaeŋ san buk lo yen dan lo ta itur sakar na tap, iŋ misilaneŋ paen na imado wa.” ¹¹ Aria, girek lo ru e yen den igo ibol, “Talpein itaotan man sinanen ilo rumok lo kumaen imado wa.” Amaiak niŋen o id kuai tem tile taloŋ ak, talpein ta Moses san kubiaeŋ iri ipani dan lo, Anut malan lo iŋ itaotan ilasa san tia ya. ¹² Gug Kubiaeŋ man ilo rumok san mel tia ya. Man ata wo? Anut san ru igo ibol a. “Talpein enti a kubiaeŋ san kagin naok naok fidian igane mok dan, dal amaiak lo mi kumaen iŋane wa.” ¹³ Id fidian kubiaeŋ san misilaneŋ paen na tumado dan, Kristus iŋiliad go misilaneŋ an patun fo tilasa ya. Dugo woŋ i? Inŋen man id niŋed o misilaneŋ paen na idug imado ya. Man dugo, ru e kubiaeŋ ilon lo yen den igo ibol a. “Talpein a ai fo iyuk dan Anut san misilaneŋ paen na imado da.” ¹⁴ Amaiak niŋen o Kristus iŋ Anut san misilaneŋ lo ipasad go patud ipasi a. An lo dop Jesus Kristus lo mi bar a Anut Abraham ipani an iŋanep gob adi diŋane wa. Ago dop man id fidian, ilo rumok lo mi, nek ibol Anut san promis irupaiaŋ ago woŋ, id Awan Urgun tiŋane wa.

Moses san kubiaeŋ, agod Anut promis ru ipanad an da

¹⁵ O teig adi, ŋai gamu tou niganag lo piteŋaneŋ a ŋurupaiaŋ dan san awan ŋubate wa. Tamol ta iŋ mitep imat ak niŋen o ilon isou tap, iŋ melmel nanun muroun lo itarpasip ipidinai san niŋen o, roun fo igire da. Aria, girek an igane itout gup girek an dabai anda yen da. Saen an lo gup, talpein ta girek an nuŋon tia yak ago igane ilasa san man tia ya. Agod iŋ ru kitek ta girek an awan ibatep ipani san dam tia ya. ¹⁶ Aria, Anut inŋsan promis ru an Abraham mi ipani wo man tia ya, tia, Abraham iŋanen kubulan da mi promis an ipidinai a. Aloŋ uyan a. Anut Abraham iŋanen malan kubulan dadi promis an ipidinai o ago ta ibol na ya. Man dugo, Anut tamolpein wei mi niŋedi wo ilon ta isou na da, tia, tamol kisaek murnap ilasa wan niŋen o mi ilon isou da. Tamol an nek Kristus. ¹⁷ ŋaisag ru en san fun man igo ya. Anut inŋsan promis Abraham ipani an lo, kontrak igane ya. An lo Kristus, gidad iŋ gamugo ilasa bo man, kontrak an iŋ dam iŋaneg yabi

a. Aria, Abraham imat la gug, anajar 430 yang Moses san kubiaen ilasa ya. Ak dugo, kubiaen a murna geig gug ilasa yan, promis a Anut wagam mi Abraham ipani an ipasig, itout go, an lo promis an nujon ta ilasa na wak i? Man tia geig a. ¹⁸ Ak dugo, melmel a promis an lo mitep tinjane wan, kubiaen tiganuri dan lom tinjane wak i? Ago tap man, promis a Anut Abraham ipani an nujon tia ya. Gug id talon ak, Abraham in Anut san promis an lo mi kontrak an injane ya. Ak dugo, Anut san promis a igane yan nujon tia yak i? Man tia geig a. Amaiak ninjen o id talon ak, id melmel uyanan a mitep tinjane wan, kubiaen tiri tupani dan lo mi tinjane san tia ya.

¹⁹ Ak ninjen o ago tap, aria, ata wo Moses san kubiaen ilasa yak i? Anut kubiaen Moses ipani an fun man, tamolpein insinaned aupasek san kagin naok naok an dile dulon a. Anut kubiaen igansig yen yang saen idaisuda amaiak lo, Abraham san kubulan a ninjen o Anut promis ibol pani an nujon ilasa ya. Taida mi, kubiaen ejel adi lo ipalu yan, agod Moses, Anut san titijae tamol, amaiak san banin lo dam ipalu ya. ²⁰ Aria, hai titijae tamol ta ninjen o njabol da, amaiak ninjen o ru fajan en njaisag ru ilon lo yen da. Moses san kubiaen man Anut san promis a Abraham ipani an idaisuda san tia ya, man dugo, tamol ta banin, ejel adi sad banid da kubiaen an diabig, aria, kubiaen an urat isini a. Ak gug Anut insen kisaek mi promis igane ya, an ninjen o mel a Anut insen kisaek mi iganei dan, mel an titijae tamol dadi dutumanig diganei dan irinani a. Fun amaiak ninjen o Anut san promis man mel malan te ya.

²¹ Ak dugo, Moses san kubiaen man Anut san promis injanen ager i? Man tia ya. Man dugo, Anut in kubiaen naon senamo geig ak ta ipanad pe, an lo kubiaen an idirad pe kumaen tumado tap man, rumok nujon, kubiaen lo mi Anut malan lo id itaotan tilasa wa. Gug ru kubiaen naok ago yak ta yen man tia ya. ²² Amaiak ninjen o Moses san kubiaen ta ibinawad na da. Tia, Anut san ru girek igo ibol, tamolpein fidian in aupasek san subanek lo mi dumado na ya. Anut mel an ile funi dugo ilasa ya. Ago pe tamolpein a Jesus Kristus o ilod rumok dan nek amaiak mi, mel a Anut san promis ru ilo rumok adi ipidinai an, mel an dinjane mok a.

²³ Aria, saen ilo rumok san dal gamugo ilasa yan lo, kubiaen man id subanek lo idirad go tumado ya. Subanek an ilon lo mi tumado yang Anut ilo rumok san dal iganeg kuai isi san saen ilasa ya. ²⁴ Kubiaen man idsad titianek tamol igo won a, kubiaen an kagin ipanad yang saen Kristus tan na ipalu yan lo itout a. Gamu saen pempem mi id Anut malan lo itaotan tilasa san dal man igo ya, idsad ilo rumok man Kristus lo mi a. ²⁵ Amaiak ninjen o Kristus ipalu yan lo, id afon kubiaen a titianek igo won an paen na ta tumado na wa.

Aj Anut san nanun muroun

²⁶ Man dugo, aj Jesus Kristus da atumani an lo aj fidian Anut san nanun muroun mok a. Anjanem ilo rumok in lo yan ninjen o mi mel an

ilasa ya. ²⁷Man ata wo? Anj ensauta a Kris adi sad fulanek lo Kristus da atumani an man, Kristus atabub ak igo ya. Nek ibol yamel ta anjanem tinim abuluwi igo wonj a. ²⁸Fun amaiak ninjen o gamu gup ta inj Juda tamol, ta inj Juda tia yak, enti inj bigabeg urat san subanek lo imado dan, enti injanen ilobol lo mi itor dan, enti inj tamol, enti inj pein, yanjak an ago ta tipate na wa. Yanjak naok ago yan man mel kawan a. Man dugo, gamu an fidian mi man Jesus Kristus lo kisaek a. ²⁹Amaiak ninjen o anj Kristus san tap, anj dam Abraham san malan kubulan mok a. An ninjen o anj Abraham san malan kubulan tap, Anut san promis ru a Abraham ipani an dam anjam mi a, ago dop injanen bar anj dam anjane mok a.

4 ¹Ŋaisag ru naok man igo ya. Tamol ta nanuk lo mi taman aben injanep san melmel kagin ta ipani na da. Tia, inj nanuk lo man nek ibol taman san urat pinein igo wonj a. Gidad melmel an fidian inj muroun, ago bo man imado yaup injanen saen idaisuda gup, melmel an fidian inj yanan paen na dien a. ²Nal a taman ipate pani an gamugo ilasa dop, inj tamolpein paed na imado wa, nanuk an taman inj tamolpein ipilianaig an lo inj nek ibol titianek tamol adi igo wonj nanuk an kagin dupani wa. Taman inj titianek adi dida injaned waged lo mi nanuk an imado se ya.

³Id dam wagam ago ya. Saen id nanuk onj man, id tan, ai, pat, did san tubud adi dabai amad tia yak paed na injaned urat pinein igo wonj tumado na ya. ⁴Ak man nal a Anut ipateg ilasa yan ate injanen Nanun igane idu ya. Inj pein ta tinjan lo ilasa ya, Juda adi sad kubiaen an paen na dam imado wo ago ilasa ya. ⁵Anut ago igane amaiak lo tamolpein a Moses san kubiaen paen na dumado dan injiliaip ipasai imul a. Anut injanen Nanun igane idu yan ninjen o id fidian Anut san nanuk njilaŋal ka tilasa wa. ⁶Anj Anut injanen nanun igo wonj amado da. Man ninjen o Anut inj Nanun san Awan Ur idinig ipalug, id bubed ilon lo iladu ya. Ago yan lo Awan Ur id ilod yabisa dop, Anut tiwaginj pe, “O Bai,” ago tabol a. ⁷Amaiak ninjen o onj urat pinein kawan igo tia ya, tia, onj Anut san nanun mok a. Aria, onj injsan nanun mok tap, Kristus lo gup melmel a fidian Anut injanen nanun muroun mok ipidinai an, onj dam ipano wa.

Pol Galesia ninjedi wo ilon muruan a

⁸Wagam anj Anut mok ak ta alonj na ya, saen an lo anj ai, pat, tan sad tubud tusadi a anut mok tia yan mi paed na amado dugo, injaned urat pinein igo wonj biabi ad agane se ya. ⁹Ak gug gamu anj Anut alonj a, tia gidad ŋai ka igo ŋabol a, gamu gug Anut anj ilonj a. An ninjen o ata wo fon amul pe tamol kagin an paed na sem idiraŋ au o di? An anj dibinawaŋ san tia ya, fun dugo, inj nujon tia ya, agod dabai amad dam tia ya. Ak dugo, anj afon injaned subanek ilon lo amado wan ninjen o ilom ibol di? ¹⁰Ŋai njile yak man, anj nal fidian anjam ilo sou igo yen da. Anj nal tubun tubun ak mi ninjen o mala nouk amado da. Kalam foun ak san nal, ubou tubun

ak san nal, ananar foun ak san ubou idu yak san nal, nek an mi ari apani da. ¹¹Ɔjai ananem kagin naok an ninen o ilog saian da, kabelan ɣaineg urat an lulunam lo ɣigane yan kawan banau.

¹²O teig taog, saen ɣai an lulunam lo ɣumado se yan, muruan ta apanag man tia ya. Tia, nek ibol an Juda sad kubiaen patun fo amado se yan ago won, ɣai dam, kubiaen patun fo ɣumado se ya. Amaiak ninen o, ɣai mel en ninen o ɣuguduanan da. Kubiaen a ɣaisag madok wagam ak itirni na yan ɣibisei la ya, an dam nek ago amado wo ilog ibol da.

¹³An ilom isou dak i? Ɔjai turen ɣabi wo dugo subam ta ifunag a, fun an ninen o ɣai imug mi ansam na ɣupalug bilalun uyanan san ru an naom na ɣufulale ya. ¹⁴Agod subam a ɣai tinig lo ilasa yan muruan tubun geig an ipanan a. Ago bo man an naom sakar go aliag saian dop abianag man tia ya. Tia, an ɣai anjiliag ak nek ibol Anut san enel igo won a, tia, nek ibol Jesus Kristus inen mi ak ago anjiliag go kagin ag agane ya. ¹⁵Ilo uyan an wagam an ɣai da nug lo tigane na yan dugot na yau ak i? An dag ideg yau boi. Rumok, ɣai an ninemi wo ru en ka ɣabol a. Nal an lo mi dal ta yen tap, an ilo uyan tubun geig lo ɣai abinawag o sinanem malami apasip apanag a. ¹⁶Ɔjai ru rumok ak mi ɣabol a. Nek amaiak lo, dugo, ɣai ansam ager igo won ɣilasa yak i?

¹⁷Teid sewak adi a wagam ninedi wo ɣurupaian an in an tubun mi dipitianan na ya. Ak gug in ilo sou uyan ak lo ago digane man tia ya. Tia, in mansama na an naom diabiani wo ilod ibol da. In ilod igo igire ya, an inaned ar lo asadu dop lo an in mi apitianai a. ¹⁸Rumok, an ɣai apitianag o tap, kagin an saen fidian yen o man uyanan a, ak gug ilo sou uyan mok ak lo mi ago agane wa. Agod saen ɣai an da tumado dan mi ago agane boi tia, saen ɣai asau mi ɣumado dan dam ago agane wo ilog yen da. ¹⁹O ɣaineg nanug adi, ɣai fon madai ɣukubiani dak, nek ibol pein nanuk igansi wak san madai igo won, maeg ɣigane yau dop Kristus an bubem ilon lo fon ilasa wa. ²⁰O kabel, ɣai gamu an da tumado dop ru mos nam ɣurupaian o ilog ibol da. Ak gug tia ya, ru dabai mi ɣupanan da. Man ata wo? Ɔjai an ninemi wo ilog tinan anda ɣumado da.

Hagar in Sara da sad ru fanan

²¹Aria, an ensauta a Moses san kubiaen paen na amado wo ilom ibol dan, ɣai awag alon o kududom agure. Ak dugo, an kubiaen an san fun mok alon uyan i? ²²Man dugo, kubiaen ilon lo id tusutig talon ak, Abraham in nanun tamol ak uraru a. Nanun a imug mi ilasa yan inisan urat pein tinan lo ilasa ya, agog nanun a murnag ilasa yan inisanen iwon mok tinan lo ilasa ya. Iwon Sara an inisan urat pein tia ya, tia, in kawan imado itor a. ²³Abraham inisanen ilo sou mi irig an lo urat pein an nanuk igansi. Ak man iwon mok man nanuk ago ta igansi na ya. Tia, in Anut san promis Abraham ipani an lo nanuk igansi a.

²⁴Aria, pein uraru en sad am san tou igo ya. Pein uraru en man kontrak uraru Anut igane ilasa amaiak sad mitilaen. Kontrak malan malan an did Sinai san a. Nanuk fidian a kontrak an paen na dilasa yan man bigabeg urat san subanek lo dumado dutor da. Pein Hagar dubol dan kontrak an ate tou ipani a. ²⁵Aria, did Sinai an tan Arabia ilon lo yen da. Hagar inj did an ate tou ipani a, agod inj dam Jerusalem e gamu yen den ate tou ipani a. Man dugo, Jerusalem inj nanun muroun dadi bigabeg urat san subanek lo dumado da. ²⁶Ak man Jerusalem lak na san man ago tia ya. Tia, tamolpein ate man bigabeg urat tia kawan dumado da. Id aben an san a. Sara aben an naon injane dan ninjen o idsad tinad man Sara, Abraham iwon. Agod pein an kubiaen san subanek ilon lo ta imado na ya. ²⁷Girek lo igo ibol,

“O niganig pein enti nanuk ta gansi san tia yan, onj uya isusa wa.

Onj enti nanuk gansek san madai ta kubiani na dan, masap ilo uyan lo sasai a.

Man dugo, onj niganig pein bo man, onjsa nanuk dusuti tap, onjsa nanuk san sutek man, pein a iwon da yan injanen nanuk san sutek irinjani geig a.”

²⁸Aria, naj teig taog, an man ibol Abraham nanun Aisak igo wonj Anut san promis ru lo alasa ya. ²⁹Ak gug Abraham san saen lo, nanuk a Abraham sinanen ilo sou lo ilasa yan, muruan tubun mok nanuk a Awan Urgan san dabai lo ilasa yan ipani a. Agog kagin an dam nek gamu ago mi yen da.

³⁰Ak man girek lo ru ta muruan an ninjen o dugo ibol ak i? An igo ibol, “Onj gidad urat pein inj nanun da sisem kudai a. Man ata wo? Urat pein san nanuk taman san filian ta injane na wa, tia, iwon mok mi san nanun taman san filian an injane wa.” ³¹Ak ninjen o teig taog, id man urat pein an san nanun muroun tia ya, tia, id pein a bigabeg urat tia kawan imado dan san nanun muroun mok a.

Kristus lo dop idsiganed aupasek isubanad san tia ya

5 ¹Kristus id a Juda sad kubiaen paen na tumado dan ipasad an lo, kubiaen an san subanek fon ta ibiad sakar na wa. Amaiak ninjen o anj anjanem madok foun ak lo atur sakar a. Anj sem idiranj pe fon kubiaen san subanek lo aladu wo ago ta agane na wa.

²Aria, naj Pol ru en itaot jurupaianj da. Anj muluj lo adu tap, anj Kristus nujon tia yak ago agane ilasa wa. ³Ijai fon njabol da wo da, talpein a muluj lo idu yan, ru kubiaen a Moses san kubiaen ilon lo dien dan, gidad wei geig bo man, an fidian iri ipani wa. Inj ru kubiaen tusan mok ak ta gigin na igane san tia geig a. ⁴Onj enti Kubiaen lo itaotan lasa wo maeg gane dan, onj Kristus san na se ipaso ya. Agod onj Anut san ilo panek bisei pasik a. ⁵Ak man id a Urgan lo tator dan, id itaot ad tilasa

wo ilod yen da. Agod Kristus lo ilod rumok an lo, id itaot ad tilasa san an ninen o mala nouk tumado dan, nuŋon tile wa. ⁶Man dugo, saen talpein ta iŋ Kristus da dutumani dan, gidad muluŋ lo idu boi, tia, muluŋ lo ta idu bo man an mel kawan a. Mel kisaek nek en mi iŋ tubun a, id ilo rumok amad da yan lo tamolpein aenta ilod tipidinaŋ da.

⁷Teig taog, aŋ imug mi man amaspalu uyanan se ya. Enti naom ifutanig, an lo gamu aŋ fon ru rumok an ta ari na di? ⁸Ilo ŋanek naok ago yan Anut a aŋ igiaŋ an san na ipalu man tia ya. ⁹Ilom isou, “Yis kitekan an flawa tubun ak da dukubulip, ifurak yaup iganep flawa fidian ikafut isuda wa.” ¹⁰Aŋ ŋai da Tubun ak lo tutumani an lo man, aŋanem ilo sou mel an ninen o, nek ibol ŋaisag ago woŋ yen yau ak ago ŋabol da. Gug talpein a iganeg aŋ ilom ibalkaluk dan, gidad iŋ tamol naok dugo yak, Anut bitinaek lo iganep ai wadan dugo igane amaiak naon ka isini wa.

¹¹Teig taog, ŋai tamol tinid suŋulon dutute ninen o ŋabol yau dop bunun an ŋai dabai ŋupani tap, fun ata wo ŋai dumisilanag dak i? An ago tap man, aigim san muruan a Juda dukubiani dugo malad lo saian geig dan itout yau a. ¹²Gidad, tamol ensauta a aŋanem ilo sou dukubuli dan, iŋsiŋaned nabud dutartip dibiliau tap, an uyanan mok a. ŋaisag ilo sou nek ago ya.

¹³Teig taog, Anut aŋ Kubiaen san subanek patun fo alasap amado wak o igiaŋ a. Ago dop aŋ kawan amado ator a. Ak gug aŋ kawan amado dan ninen o, aŋanem tinim san kagin saiak saiak an mi ari apani wo ago ta agane na wa. Tia, aŋ ilo panek lo mi nug abinawi wa, aŋ nek ibol urat pinein ago woŋ ilo sou ago agane wa. ¹⁴Man dugo, kubiaen san ru fidian man itumanig ru kisaek en lo mi ilasa ya. “Oŋ siŋane tini ninen o umat ago mi, tamolpein aenta dam niŋedi wo umat a.” ¹⁵Ak man aŋ goun kasik igo woŋ alasap, aenta afunai dop aniai tap, kagin agane wa. Man dugo, aŋ murnap nug afini dop nug daon apani dop ago amado wa.

Awan Urgun san ilobol lo mi ator a

¹⁶ŋai igo ŋurupaiaŋ da, Awan Urgun san ilobol lo mi ator a. Aŋ ago agane tap, tinim san ilo masai an ta ari apani na wa. ¹⁷Man dugo, aŋsam tinim san ilo masai man Urgun san ilobol iŋsan ager a, agod Urgun san ilobol dam tinim san ilo masai san ager a. Uraru an nug dufuni woŋ da. Awan Urgun ago igane yan fun man, oŋane tini san ilo masai an ilasa wo igane dop san dal ifutani pani wa. ¹⁸Gug aŋ Awan Urgun paen na amado tap, Moses san kubiaen ka iriŋanaŋ a.

¹⁹Aria, kagin naok naok a tinik san ilobol lo dilasa yan kuai isi a. Jeit kagin, kagin ikokan tia yak, kagin funfun nun anda yak, ²⁰oŋ tubud ai pat sad mitilaed ubou ad ule dak, nawir ganek, siai, nug funek, turak susai, tiŋae saiak, oŋse mi wo ilo sou gane dak, ilo kisaek kagin umoi, ru

rumok onsa doup lo mi yen dugo aenta sad na tia ubol dak, ²¹ aenta sad filian o mala isi dak, you sakar ak uluk dugo kukok nun anda yak funfun gane dak, agod kagin naok ago yak aenta dam fidian ago mi a. Ijai ru dabai anda wagam nupanarj la ya, agog gamu fon nupanarj da, tamolpein kagin naok ago yak diri tap, inj Anut san kagin panek ilon lo diladu san tia geig a.

²² Ak man Awan Urgan san nujon man, ilo panek, yousai, maror, mos ganek, ilo mujanek, kagin uyanan ak gane dak, onjane ru ganuri dak, ²³ maror lo mado dak agod se tini titiani uyanan da. Kubiaerj ta lo kagin naok ninjen o geg ta igane na ya. ²⁴ Agod tamolpein a Jesus Kristus san amaiak injad kagin wagam ak fidian aigim fufo dubalig, an lo tinik san ilobol agod tinik san ilo masa an da sisem dumat a.

²⁵ Teig taog, id Awan Urgan lo tator tap man, injanen ilobol mi tiganuri wa. ²⁶ Talpein ta id lulujad lo se pitianoi kagin ta igane na wa. Ansem lo nug ilo saian apani dop nug ta afuni na wa. Agod an nug san melmel o malam ta isi na wa.

Nug san muruan asini

6 ¹ Teig taog, saen tamol ta anjam midaerj ilon lo aupasek igane dop an mel an kuai apani tap, talpein a pempem Awan Urgan da ditor dan mos nam dibinawip Anut san dal iri da wa. Ansem dam kagin agane wa, kabelan mel an ilom injanep, an dam aupasek naok an lo adu banau. ² Nug san muruan asini wa, ago dop man an Kristus san kubiaerj ibol ago aganuri wa.

³ Talpein a injen yajan anda ibol, gug Anut malan lo inj yajan tia ya, an lo injen irawi da. ⁴ Ago gug onsigane urat bitinaek lo gane dop urat an naok dugo yak ka kubiani wa. Fun dugo, onse ipitiano wo ilo ibol tap, se pitianoi kagin an san fun inj tamol sen ak san silali naon lo se yaja ta wabisa na wa. ⁵ Man dugo, id anen anen atem idsiganed muruan tisini wa.

⁶ Talpein a manau injane dan, injsinanen mel uyan an fidian iwaep, girek manau a manau ipitejani dan da sisem mel an dijane wa.

⁷ Ak dugo, on Anut awan patu pani dop inj naon muruan ta ipano na wak ago ubol di? Mel an ninjen o se ta irawo na wa. Man dugo, talpein ta ai patun naok dugo yak ipae tap, inj murnap ai patun naok an mi nujon mok injane wa. ⁸ Saen talpein ta ai patun a sen tinin mi kagin ipani san an ipae tap, nujon man injsinanen tinin nutun da malan isue wa. Gug inj ai patun a Urgan ilo uyan ipani san an ipae tap, nujon man Urgan inj kumaen pempem yen yau san an ipani wa. ⁹ Amaiak ninjen o id kulob uyan uyan an mi tigane san kagin lo tatur sakar a. An ago tigane wo ilod ta isali na wa. Man dugo, murnap idaned naon tijane san saen gamugo idu dop, id ilod ta idu yau na tap, idaned naon sinjok aman an tijane wa.

¹⁰An ningen o saen id mel uyan ak ta lo tamolpein aenta tibinawai o dal ta tile tap, ka ago tigane pidinai a. Rumok, tamolpein fidian tibinawai a, ago gug Kris adi tibinawai san man malan te ya.

Oŋ talpein foun ak lasa wa.

¹¹Ŋaisag girek en tintinan mi ŋigire da, ante dop aŋ alon ak girek en ŋai sinag banig mok nam ŋigireg aŋsam na ipalu ya. ¹²Tamol ensauta a aŋ muluŋ lo adu wo disadudunaŋ dan man iŋsed mi wo ilo sou digane da. In aŋ niŋemi wo ilod ta isou na da. Fun dugo, in Juda aenta muruan dupidinai o dumoi da. Kagin nek an iŋsad kulob san fun mok. Man ata wo? Juda wei mi Kristus san aigim iŋsan ager ago dumado dan lo, Juda a muluŋ kagin dabai ta dupani na dan muruan dupidinai da. ¹³Ago bo man, tamol a muluŋ lo dudu yan iŋsed mi Kubiaen san ru an fidian ta diri dupani na da. In disadudunaŋ dop muluŋ lo adu san fun man, aŋ iŋsad megeloum igo won alasa wa, ago dop Juda aenta malad lo sed ipitianai a.

¹⁴Ak man ŋai seg ipitianag dop, nek ibol in sed ipitianai dak, ago ŋigane man ŋamoi da. Tia geig a. Kristus san aigim amaiak ŋai ningen o mi seg ipitianag da. Man dugo, iŋsan aigim fo ŋai ŋamat la ya, ago dop tan en san mala bulbal ŋai ilog iŋane san tia ya. Agod iŋsan aigim ningen o ŋai ilo sou igo ŋigane da, tan en san dal fidian an nek ibol mel ta imat la yak igo won a, agod ŋai ŋuri ŋupani wo ŋamoi da. ¹⁵Gidad oŋ muluŋ lo udu boi, tia muluŋ lo ta udu na boi, an mel kabel mi a. Mel kisaek nek en mi tubun a, Anut mi titiani dop, iŋsen mi iganep oŋ talpein foun ak lasa wa. ¹⁶Tamolpein ensauta a iŋsad turen lo ŋaisag piteŋanek duri dupani dop lo dutor dan, Anut iŋsan maror agod iŋsan ilo muŋanek dam, ipidinaip lo ago dumado wa. Tamolpein amaiak mi in Anut san Isrel mok.

¹⁷Saen gamu tumado yau den lo talpein ta ŋai muruan ta ipanag na wa. Man dugo, ŋai Jesus ningen o tini madai dupanag an san teb ŋisinin ŋumado da.

¹⁸Teig taog, ŋai Anut ŋusumiani dop Jesus Kristus idsad Tubun en iŋsan ilo panek aŋ ŋutumi ilon lo ka yen a. Rumok.